



UKA 15/24.1

13. Oktober 2015

Naaja H. Nathanielsen

Siunnersuut uunga: Inunnik paasissutissanik suliarinnittarneq pillugu Kunngip Peqqussutaata Kalaallit Nunaanni atuutilersinneqarnissaanik Namminersorlutik Oqartussat pisinnaatinneqarnissaat pillugu Inatsisartut aalajangiiffigisassa.
(Aningaasaqarnermut Aatsitassanullu Naalakkersuisoq)

Inatsisissatut siunnersuutip siunertaraa innuttaasunut tunngasut paasissutissat atornerlunneqannginnissaat siunertarimmagu. Inatsisissatut siunnersuummi aamma kissaatigineqarpoq inatsisit atuuttut nutarterneqarnissaat.

Qularutissaanngilaq maannakkut malittarisassat atuuttut nutaanngilisimmammata. Malittarisassat atuuttut 1978-imeersuupput, taamaattumillu nutarterneqartariaqarluinnarlutik. Kisianni Inuit Ataqatigiit piareersimangillat inatsisissatut siunnersuut akuerissallugu. Paasinnittaaserput malillugu sulii oqallisigisassaqaqagut.

Aallaqqaasiullugu maluginiarparput tusarniaanermi akissutigineqartut qularuteqartut amerlammata. Inuit Ataqatigiit isumaqarput tusarniaanermi isorinnillutik akissutigineqartut pimoorunneqartariaqartut uani Naalakkersuisut inatsisissatut siunnersuuteqarnerminni taamaaliorisimanginnerannut sanilliullugu.

Aammattaaq maluginiarsimavarput pineqartoq pillugu Naalakkersuisunut §37 apeqqutit akiuminaatsinneqarsimasut, taamaallaallu innersuutigiinnarlugu "Naalagaaffiup" akisussaaffigigaa. Inatsisissaq pillugu ukioq manna junimi inatsisartuni ilaasortaasimasoq Aaja Chemnitz Larsen arlalinnik apeqquteqarsimavoq¹. Naalakkersuisut akissuteqarnerminni ilaatigut allapput inatsisissaq pillugu paasisitsiniaanermik "innuttaasunut kattuffinnullu" ingerlataqarnissamik eqqarsaatersuuteqarlutik. Kisianni ullumikkut aalajangiinissatsinnut paasissutissat tunniunneqartut malillugit Naalakkersuisut isumartik allangortissimavaat. Maannakkut Naalakkersuisut ICC-ip tusarniaanermi akissutaannut oqaaseqarnerminni Inunnik paasissutissanik suliarinnittarneq pillugu inatsisissap atuutilinginnerani paasisitsiniaanissap pisariaqarnissaa ilalersinnaanagu. Naalakkersuisunut akeqqussavarput sooq junimiit septemberimut paasisitsiniaanissamut isumartik allangortissimaneraat.

Inuit Ataqatigiit-niit siunnersuut Inatsisit pillugit ataatsimiititaliamut sukumiisorujussuarmik suliassanngortillugu innersuussutigissavarput. Inatsisit pillugit ataatsimiititaliamut qinnutigissavarput tusarniaanermi isorinnittumik akissuteqaatit isummorsorfigisagaat kiisalu inatsisissap kingunerisassaanik qularutigineqartut saqqummiunneqassasut. Inuit Ataqatigiit soqutigilluinnarpaat qanoq Nalunaarsukkat Pillugit Nakkutilliisoqarfik akuutigissanersoq, siunissamilu qanoq inissisimassanersoq. Aammattaaq maalaarsinnaatitaanermut kiisalu inatsisit kingunissaat EU-mut tunngatillugu Ataatsimiititaliamit eqqarsaatersuutigilluarneqarnissaat. Inuit Ataqatigiit kissaatigaattaaq siunissami qanoq Inatsisartut sunniuteqarsinnaanersut uani pineqartumi. Aamma Naalakkersuisunut itisileqqussavarput sooq Inatsisartut inatsisissaannik sananissamik itigartitsinersut, taamaallaallu Kunngip peqqussutaanik atuutitsilerlutik.

1

1

Naggataatigut Naalakkersuisunut eqqaasissutigissavarput Inatsisartuni ilaasortaasimasup Aaja Chemnitz Larsen-ip §37 apeqqutigisaani sooq pisortanit unioqqutitsisoqarnermi taakkununnga kinguneqartitsisoqarsinnaannginnersoq suli akineqanngimmat.
Uani pineqarpoq innuttaasut namminerisaminnik inuuneqarsinnaanerat, taamaattumillu sammisaq pingaaruteqartorujussuuvoq.